

МЕСЯЦА ДЕКЕМВРИА В 4-Й ДЕНЬ.

ПРЕПОДОБНАГО ОТЦА НАШЕГО ИОАННА ДАМАСКИНА

НА ВЕЛИЦЕЙ ВЕЧЕРНИ

На Господи воззвах стихиры, глас 8.

Подобен: О преславнаго чудесе:

Отче Иоанне всеумдре, * церковь Христову уяснил еси песньми, * божественнейшая сладкопоя, * О всеславне, * действием, отче, Духа, * твою цевницу ударяя, * всесличней Давидове подобяся. * Еюже возглашая, * божественными песньми вся привлекл еси. **[Трижды.]**

Отче Иоанне славне, * мирския отступль мятежныя молвы, * ко Христове притекл еси тишине, * О преподобне, * и видении божественными и деянии, * всебогатыми яве светлостьми * истинно обогатился еси, * и верным преподавал еси, * боголепным сияя житием, блаженнейше. **[Трижды.]**

Приидите, земнороднии, * песньми священное * и честное преподобнаго торжество Иоанна * днесь благочестно воспоем: * сей бо истинно божественнаго * осияния сподобися свет прияти. * О неизреченнаго твоего благоутробия, * Господи, имже мы познахом * славити Тя Преплагаго. **[Дважды.]**

Слава, глас 6:

Яко божественна жизнь твоя, * такожде и всеосвященный твой исход, * преблаженне отче наш Иоанне. * Днесь бо ликующе в память преставления твоего, * всея страны множества народа стекшися, * яко видеша тя, без дыхания на одре лежаща, * гласы велегласными вопияху: * даждь нам конечное слово утешения, * рабом твоим, святе, и научи ны, чада твоя, * отче, яже ущедрил еси, яко отец, * како ты по достоянию похвалити возможем? * Поистинне яко милостив и щедр быв, преподобне. * Обаче аще и zde ты гроб покрывает, * но страна ты Российская вся богата имать * предстателя и молитвенника к Святей Троице, * Юже непрестанно моли о душах наших.

И ныне, Богородичен:

Кто Тебе не ублажит, Пресвятая Дево; * кто ли не воспоет Твоего Пречистаго Рождества; * безлетно бо от Отца Возсиявый Сын Единородный, * Тойже от Тебе, Чистыя, пройде, * неизреченно воплощя: * естеством Бог сый, * и естеством быв Человек нас ради, * не во двою лицу Разделяемый, * но во Двою Естеству * неслитно Познаваемый. * Того моли, Чистая, Всеблаженная, * помилуватися душам нашим.

Вход. Прокимен дне. И чтения три преподобническия.

Премудрости Соломони чтение (главы 5 и 6):

Праведницы во веки живут, и в Господе мзда их, и попечение их у Вышняго. Сего ради примут царствие благолепия и венец доброты от руки Господни, зане десницею покрывает я и мышцею защитит их. Приемет всеоружие рвение свое и вооружит тварь в месть врагом. Облечется в броня правды и возложит шлем суд нелицемерен. Приемет щит непобедимый преподобие, поострит же напрасный гнев во оружие, споборет же с ним мир на безумныя. Пойдут праволучныя стрелы молниины и, яко от благокругла лука облаков, на намерение полетят, и от

каменометныя ярости исполнь падут грады. Вознегодует на них вода морская, реки же потопят я нагло. Сопротив станет им дух силы и, яко вихор, развеет их, и опустошит всю землю беззаконие, и злодейство превратит престолы сильных. Слышите убо, царие, и разумеите, навькните, судии концев земли. Внушите держащие множества и гордящиеся о народех язык, яко дана есть от Господа держава вам и сила от Вышняго.

Премудрости Соломони чтение (глава 3):

Праведных души в руке Божией, и не прикоснется их мука. Непщевани быша во очесех безумных умрети, и вменися озлобление исход их, и еже от нас шествие сокрушение, они же суть в мире. Ибо пред лицом человеческим аще и муку примут, упование их безсмертия исполнено. и в мале наказани бывше, великими благодетельствовани будут, яко Бог искуси я и обрете их достойны Себе. Яко злато в горниле, искуси их и, яко всеплодие жертвенное, прият я. И во время посещения их возсияют и, яко искры по стеблию, потекут. Судят языком и обладают людьми, и воцарится Господь в них во веки. Надеющийся Нань разумеют истину и вернии в любви пребудут Ему, яко благодать и милость в преподобных Его и посещение во избранных Его.

Премудрости Соломони чтение (глава 4):

Праведник аще постигнет скончаться, в покои будет. Старость бо честна не многолетна, ниже в числе лет исчитается. Седина же есть мудрость человеком, и возраст старости житие нескверное. Благоугоден Богови быв, возлюблен бысть. Восхищен бысть, да не злоба изменит разума его или лесь прельстит душу его. Рачение бо злобы помрачает добрая и парение похоти пременяет ум незлобив. Скончався в мале, исполни лета долга, угодна бо бе Господеву душа его, сего ради потщася от среды лукавствия. Людие же видевшие и не разумевшие, ниже положше в помышлении таковое, яко благодать и милость в преподобных Его и посещение во избранных Его.

На стиховне:

Радуйся, ангельским беседея ликостоянием, * Иоанне преподобне: житие бо твое, отче, * на земли добродетельно стяжав, * пожил еси. * Показался чистоты нескверное зещало воистинну, * лучезарныя восприемля молнии Духа Святаго всеславно. * Отонудуже озаряемь, * зрел еси будущая, вся предглаголя, * от Божественнаго светоявления научаемь * Христа, Егоже моли * душам нашим подати велию милость.

Стих: Честна пред Господем смерть преподобных Его.

Радуйся, постником споспешник быв * и непобедим поборник: * страстей бо отсекая корень и бесов стремления, * представ мужески, Иоанне, * тех посрамил еси душепагубную прелесть, * Креста же Спасова действо и непобедимую явил еси силу, * еюже и препоясався, * победил еси вся, * отметающия плотское явление Христово. * Егоже моли душам нашим подати велию милость.

Стих: Блажен муж, бояйся Господа, в заповедех Его восхоцет зело.

Столп световиден, добродетелию утвержден, * облак светел, * иже во отечестве твоём явился еси, отче, * к Небеси от земли Бога зрящих предводя; * крестною палицею страстей пресек море * и, мысленнаго Амалика отринув, * непреткновенный Небесный восход обрел еси, * Богоблаженне Иоанне, * и жребий неприминующ, * со Безплотными предстоя Престолу Христову, * радуяся, Егоже моли душам нашим подати велию милость.

Слава, святаго, глас 6:

Преподобне отче, * во всю землю изыде вещание исправлений твоих: * тем на небесех обрел еси мзду трудов твоих, * демонския погубил еси полки, * и ангельския достигл еси чины, * ихже житию непорочно поревновал еси. * Дерзновение имея * ко Христу Богу, * мир испроси душам нашим.

И ныне, богородичен.

Творец и Избавитель мой, Пречистая, * Христос Господь, * из Твоих ложесн прошел, * в мя Оболкийся, * первыя клятвы Адама свободи. * Темже Ти, Всечистая, * яко Божии Матери же и Деве воистинну, * воишем немолчно: * радуйся Ангельски, * радуйся, Владычице, * Предстательство и Покрове * и Спасение душ наших.

Аще не поеши бдения, Крестобогородичен:

Видящи Тя распинаема, Христе, * Тебе Рождающая вопияше: * что странное еже вижу таинство, * Сыне Мой, * како на древе умираеши, * плотию повешен, * жизни Подателю?

Тропарь, глас 8:

Православия наставниче, благочестия учителю и чистоты, * вселенныя свещице, монашествующих богодохновенное удобрение, * Иоанне премудре, * ученьми твоими вся просветил еси, * цевнице духовная, моли Христа Бога, * спастися душам нашим.

Слава, и ныне, Богородичен.

Иже нас ради Рождейся от Девы, * и распятие претерпев, Благий, * испровергий смертию смерть, и Воскресение явлей, яко Бог, * не презри, яже создал еси рукою Твоею, * яви человеколюбие Твое, Милостиве, * приими Рождающую Тя Богородицу, молящуюся за ны, * и спаси, Спасе наш, люди отчаянныя.

НА УТРЕНИ

На Бог Господь: Тропарь, глас 8:

Православия наставниче, благочестия учителю и чистоты, * вселенная светильниче, монашествующих богодохновенное удобрение, * Иоанне премудре, * ученьми твоими вся просветил еси, * цевнице духовная, моли Христа Бога, * спастися душам нашим. [Дважды.]

Слава, и ныне, Богородичен.

Иже нас ради Рождейся от Девы, * и распятие претерпев, Благий, * испровергий смертию смерть, и Воскресение явлей, яко Бог, * не презри, яже создал еси рукою Твоею, * яви человеколюбие Твое, Милостиве, * приими Рождшую Тя Богородицу, молящуюся за ны, * и спаси, Спасе наш, люди отчаянные.

По 1-й стихологии седален, глас 1.

Многосветлая звезда монашествующим * показался еси и степень известен, * воздержания же предел, * пресветлое зеркало разсуждения, преподобне, * память твою радостно совершающим. * Разрешения проси согрешений, преблаженне, * Богу предстоя.

Слава, и ныне, Богородичен:

Настави ны на путь покаяния, * уклонившая присно к безпутием зол * и Препоблагаго прогневавшая Господа, * Неискусобрачная Благословенная Марие, * прибежище отчаянных человеков, Божие жилище.

По 2-й стихологии седален, глас 3.

Подобен: Божественныя веры:

Божественным желанием безсмертия, * Иоанне, * одержим и крест на рамо взем, * в пустыню желанием вселился еси, * идеже, преподобне, Господеви собрал еси стадо. * Темже и молитвенника тя тепла стяжахом ко Господу.

Слава, и ныне, Богородичен:

Божественная скиния была еси Слова, * едина Пречистая Мати Дево, * чистотою Ангелы превозшедшая, * паче всех мене, персть бывша, * осквернена плотскими прегрешеньми, * очисти молитв Твоих Божественными водами, * подающи, Чистая, велию милость.

По полиелеи седален, глас 8.

Подобен: Премудрости:

Видение и деяние восприим, * чувства, преподобне, * украшая, житие управил еси к Божественным повелением, * монахом бо явился еси светильник пресветел, * наставляя нас к познанию. * Темже, восхваляюще тя, величаем любовию исходную память твою, * Богоносе Иоанне. * Сего ради вопием ти: * моли Христа Бога прегрешений оставление * даровати чтущим любовию святую память твою.

Степенна, глас 4. Антифон 1-й, ихже стихи повторяюще поем:

От юности моя * мнози борют мя страсти, * но Сам мя заступи, * и спаси Спасе мой.

Ненавидящие Сиона, * посрамитесь от Господа, * яко трава бо огнем * будете изсохше.

Слава: Святым Духом * всяка душа живится, * и чистотою возвышается, * светлеется Троическим Единством священнотайне.

И ныне, тойже.

Прокимен, глас 7:

Прокимен : Честна пред Господем смерть * преподобных Его.

Стих: Что воздам Господеву о всех, яже воздаде ми?

Евангелие от Матфея, зачало 43.

Рече Господь Своим учеником: вся Мне предана суть Отцем Моим, и никтоже знает Сына, токмо Отец, ни Отца кто знает, токмо Сын, и емуже аще волит Сын открыти. Приидите ко Мне вси труждающиеся и обремененнии, и Аз упокою вы. Возмите иго Мое на себе, и научитесь от Мене, яко кроток есмь и смирен сердцем, и обрящете покой душам вашим. Иго бо Мое благо, и бремя Мое легко есть

По 50-м псалме

Слава: Молитвами апостолов, * Милостиве, очисти * множества согрешений наших.

И ныне: Молитвами Богородицы, * Милостиве, очисти * множества согрешений наших.

Таже, глас 6: Помилуй мя Боже * по велицей милости Твоей, * и по множеству щедрот Твоих * очисти беззаконие мое.

Стихира, глас 6:

Преподобне отче, * во всю землю изыде вещание исправлений твоих: * тем на небесех обрел еси мзду трудов твоих, * демонския погубил еси полки, * и ангельския достигл еси чины, * ихже житию непорочно поревновал еси. * Дерзновение имея * ко Христу Богу, * мир испроси душам нашим.

Канон, глас 2.

Песнь 1.

Ирмос: Во глубине постла иногда, * фараонитское всевоинство преоруженная сила, * воплощенное же Слово * всезлобный грех потребило есть: * Препрославленный Господь * славно бо прославися.

Твоя похвалы начати хотящу ми, подаждь твой ныне глас медоточный, преподобне, имже православную уяснил еси Церковь песньми, отче Иоанне, яже твою почитает память.

Яко мудр и остроумен судия, изряднейше сущих естество смотря, нестоящих предразсудил еси вечнующая: привременными бо изменил еси пребывающая, отче Иоанне, идеже ты и ныне Христос прослави.

Богородичен: Превышши явилася еси, Чистая, всякия твари, видимыя же и невидимыя, Приснодево: Зиждителя бо родила еси, якоже благоволи воплотитися во утробе Твоей: Егоже со дерзновением моли спасти поюция Тя.

Песнь 3.

Ирмос: Процвела есть пустыня, яко крин, Господи, * языческая неплодющая церковь, пришествием Твоим, * в нейже утвердися мое сердце.

Расточил еси богатство, Богу взаим дая: темже тебе на небесех уготовася Царство: но и ныне воздаяние, Иоанне, приял еси многократное.

Премудрости талант прием, деяньми украшая, уяснил еси, Иоанне, Церковь Христову: Егоже многоусугубляеши, и житие оставив.

Богородичен: Чини удивишася ангельстии, Пречистая, и человеческая устрашишася сердца о Рождестве Твоем. Темже Тя Богородицу верою чтим.

Седален, глас 3.

Труба богогласна освящена, * священнейше, нам явился еси, * песнопойуще образно учения * Господа и Спаса концем, * и твоими словесы мир просветил еси, * Иоанне преподобне, * Христа Бога моли даровати нам велию милость.

Богородичен: Божественная скиния была еси Слова, * едина пречистая Мати Дево, * чистотою ангелы превозшедшая: * паче всех мене персть бывша, * осквернена плотскими прегрешеньми, * очисти молитв твоих божественными * водами, подающи, * Чистая, велию милость.

Аще не поеши бдения, Крестобогородичен: Нескверная Агнице Слова, * Нетленная Дево Мати, * на Кресте зрящи повешена из Нея без болезни Прозябшаго, * матерски подобно рыдающи, вопияше: * увы Мне, Чадо Мое, * како страждеша волею, * хотя избавити * от страстей безчестия человека?

Песнь 4.

Ирмос: Пришел еси от Девы, * не ходатай, ни ангел, * но Сам Господи воплощься, * и спасл еси всего мя человека. * Тем зову Ти: * слава силе Твоей Господи.

Повелению Христову повинувся, оставил еси мирскую красоту, богатство, сладость, светлость: егоже ради взял твой крест, последовал еси, Иоанне мудре.

Сообщив общившему Христу, человеческого ради спасения, прославился еси, якоже Той обещася, и царствуеша же Присноцарствующему, Иоанне.

Богородичен: Тя пристанище спасения, и стену небориму, Богородице Владычице, вси вернии вемы: Ты бо молитвами Твоими от бед избавляеши души наша.

Песнь 5.

Ирмос: Ходатай Богу и человеком был еси Христе Боже: * Тобою бо Владыко, * к Светоначалинику Отцу Твоему, * от ноци неведения, * приведение имамы.

Страхом Христовым, отче, утверждаемь к божественной жизни, плотское мудрование все покорил еси духу, твоя, Иоанне, чувства очищая.

Очистив всякия скверны тело и ум, и душу тщаливо, богомудре, зарю приял еси трисолнечную, Иоанне, светлыми тя богатыщую дарованиями.

Богородичен: Моли Твоего Сына и Господа, Дево Чистая, плененным избавление от противнаго обстояния, на Тя надеющимся мирное даровати.

Песнь 6.

Ирмос: В бездне греховней валяся, * неизследную милосердия Твоего призываю бездну: * от тли Боже мя возведи.

Просветився Духа благодатию, божественных и человеческих знанием вещей ясно обогатился, требующим, Иоанне, независтно преподал еси.

Подобне ликом небесным, мудре, Церковь православно украсил еси, ликостоянные песни пригласяя Троице боговещанныя.

Богородичен: Неискусомужно, Дево, родила еси, и вечнуеши Дева, являющи истиннаго Божества Сына и Бога Твоего образы.

Кондак, глас 4.

Подобен: Вознесыйся на Крест:

Песнописца и честнаго богоглагольника, * Церкви наказателя и учителя, * и врагов сопротивоборца Иоанна воспоим: * оружие бо взем Крест Господень, * всю отрази ересей прелесть, * и яко теплый предстатель к Богу, * всем подает прегрешений прощение.

Икос: Церковному наставнику и учителю и жерцу, яко таиннику неизглаголаных возопием согласно: иже к Богу твоими молитвами отверзи уста наша, и сподоби глаголати словеса учений твоих: ты бо Троице явился еси сопричастник, яко другое солнце облистая в мире, чудеса и учении просияв, яко Моисей, в законе Господни поучаяся всегда, словом и делом был еси светильник, и моля непрестанно всем подати прегрешений прощение.

Песнь 7.

Ирмос: Богопротивное веление * беззаконнующаго мучителя высок пламень вознесло есть: Христос же простре богочестивым отроком росу духовную, Сый благословен, и препрославлен.

Ревностию разжигаемь, богоборных ересей всякое злоумие возразил еси светлыми писании, убелив всем ясно древле сеянная, мудрыми, о Иоанне, написанныя тонко.

Тепле обличил еси злоименных учеников Манента хульное нечестие, развратити покусившееся Церковь Христову, словесы и догматы твоими, о Иоанне, яже счинил еси.

Богородичен: Святых святейшую проразумеваем Тя, яко едину рождшую Бога непременнаго, Дево нескверная, Мати безневестная: всем бо источила еси верным нетление, божественным рождеством Твоим.

Песнь 8.

Ирмос: Пещь иногда огненная в Вавилоне действия разделяше, * Божиим велением халдеи опаляющая, * верная же орошающая, поющыя: * благословите вся дела Господня Господа.

Обличил еси яве, треблаженне Иоанне, Несториево разделение, Севирова слияние, единовольное пребезумие: веру же единодействию, сияние православия всем облистав концем.

Всея враг плевелы обычно еретическия в Церкви Христове, сего поклонения отметатися во иконах честных, но обрете не дремающа тя, всеблаженне Иоанне, всякое семя злое искореняюща.

Богородичен: Ты от Отца Неразлучнаго, во чреве богомужно Пожившаго, безсеменно зачала еси, и несказанно родила еси Богородительнице Пречистая: темже Тя спасение всех нас исповедаем.

Песнь 9.

Ирмос: Безначальна Родителя Сын, Бог и Господь, * воплощься от Девы нам явися, * омраченная просветити, собрати расточенная: * тем Всепетую Богородицу * величаем.

Научил еси вся церковныя пети сыны православно, Единицу в Троице Честную: воплощение же Слова Божественнаго богословити яве, Иоанне, уясняя неудобопостижная многим во священных Писаниих.

Святых чины песнословив, преподобне, Чистую Богородицу, Христова Предтечу, таже Апостолы, пророки с постники и мудрыя учителя, праведники и мученики, в тех ныне водворяешися скииних.

Богородичен: Чертог была еси, иже паче ума воплощения Слова, Дево Богородительнице, одяна славою добродетелей и испещрена. Тем Тя, Всенепорочная, Богородицу возвещаем.

Светилен преподобнаго:

Яко Божествен свет, отче наш, Церкви возсиял еси пеней твоих сию светлостию облистав, и светом нрава твоего, имже Христовы догматы являеши украшены, к Немуже не престай о нас моляся, Иоанне.

Слава, и ныне, Богородичен: Воистинну Тя Богородицу исповедуем, Владычице, Тобою спасаемии: ибо Бога неизреченно родила еси разорившаго Крестом смерть, и к Себе привлекшаго преподобных соборы, с нимиже восхваляем Тя, Дево.

На стиховне:

Отче Иоанне всемудре, * церковь Христову уяснил еси песньми, * божественнейшая сладкопоя, * О всеславне, * действием, отче, Духа, * твою цевницу ударяя, * всесличней Давидове подобяся. * Еюже возглашая, * божественными песньми вся привлекл еси. [Дважды.]

Отче Иоанне славне, * мирския отступль мятежныя молвы, * ко Христове притекл еси тишине, * О преподобне, * и видении божественными и деянии, * всебогатыми яве светлостьми * истинно обогатился еси, * и верным преподал еси, * боголепным сияя житием, блаженнейше.

Приидите, земнороднии, * песньми священное * и честное преподобнаго торжество Иоанна * днесь благочестно воспоем: * сей бо истинно божественнаго * осияния сподобися свет прияти. * О неизреченнаго твоего благоутробия, * Господи, имже мы познахом * славити Тя Преблагаго.

Слава, преподобнаго, глас 8:

Монахов множества, * наставника тя почитаем, отче наш Иоанне: * твоею бо стезею воистинну * право ходити познахом: * блажен еси, Христу работав, * и вражию обличил еси силу, * Ангелом собеседниче, * преподобных сопричастниче и праведных, * с нимиже молися Господеву помиловатися душам нашим.

И ныне, Богородичен или Крестобогородичен, глас тойже:

Подобен: О преславнаго чудесе:

Не терплю, Чадо, * видящи Тя, на Древе уснувши, * бодрость всем подающего, *
яко да иже древле преступления * плодом сном погибельным уснувшим, *
Божественную и спасительную бодрость подаси, * Дева глаголаше, плачущи, * Юже
величаем.

НА ЛИТУРГИИ

Блаженны от канона, песни 3-я и 6-я.

Расточил еси богатство, Богу взаим дая: темже тебе на небесех уготовася Царство: но и ныне воздаяние, Иоанне, приял еси многократное.

Премудрости талант прием, деяньми украшая, уяснил еси, Иоанне, Церковь Христову: Егоже многоусугубляеши, и житие оставив.

Просветился Духа благодатию, божественных и человеческих знанием вещей ясно обогатился, требующим, Иоанне, независтно преподал еси.

Подобне ликом небесным, мудре, Церковь православно украсил еси, ликостоянные песни приглашая Троице боговещанныя.

Обличил еси яве, трѣблаженне Иоанне, Несториево разделение, Севирова слияние, единовольное пребезумие: веру же единоейственну, сияние православия всем облистав концем.

Всея враг плевелы обычно еретическия в Церкви Христове, сего поклонения отметатися во иконах честных, но обрете не дремающа тя, всеблаженне Иоанне, всякое семя злое искореняюща.

Слава: Научил еси вся церковныя пети сыны православно, Единицу в Троице Честную: воплощение же Слова Божественнаго богословити яве, Иоанне, уясняя неудобопостижная многим во священных Писаниих.

И ныне: Святых чины песнословив, преподобне, Чистую Богородицу, Христова Предтечу, таже Апостолы, пророки с постники и мудрыя учителя, праведники и мученики, в тех ныне водворяешия скинии.

Тропарь, глас 8:

Православия наставниче, благочестия учителю и чистоты, * вселенныя светильниче, монашествующих богодохновенное удобрение, * Иоанне премудре, * ученьми твоими вся просветил еси, * цевнице духовная, моли Христа Бога, * спастися душам нашим.

Кондак, глас 4.

Песнописца и честнаго богоглагольника, * Церкви наказателя и учителя, * и врагов сопротивоборца Иоанна воспоим: * оружие бо взем Крест Господень, * всю отрази ересей прелесть, * и яко теплый предстатель к Богу, * всем подает прегрешений прощение.

Прокимен, глас 7: Честна пред Господем смерть * преподобных Его.

Стих: Что воздам Господеву о всех, яже воздаде ми?

Апостол к Галатам, зачало 213.

Братие, плод духовный есть любви, радость, мир, долготерпение, благодать, милосердие, вера, кротость, воздержание: на таковых несть закона. А иже Христовы суть, плоть распяша со страстьми и похотьми. Аще живем духом, духом и да ходим. Не бываем тщеславни, друг друга раздражающе, друг другу завидяще. Братие, аще и впадет человек в некое прегрешение, вы духовнии исправляйте такового духом кротости: блюдыи себе, да не и ты искушен будеши. Друг друга тяготы носите, и тако исполните закон Христов.

Аллилуия, глас 6: Блажен муж, бояйся Господа, в заповедех Его восхоцет зело.

Стих: Сильно на земли будет семя его.

Евангелие от Луки, зачало 24.

Во время оно, ста Иисус на месте равне, и народ ученик Его, и множество много людей от всея Иудей и Иерусалима, и помория Тирска и Сидонска, иже приидоша послушати Его и исцелитися от недуг своих, и страждущии от дух нечистых, и исцеляхуся. И весь народ искаше прикастися Ему, яко сила от Него исхождаше, и исцеляше вся. И той возвед очи свои на ученики своя, глаголаше: блажени нищии духом, яко ваше есть Царствие Божие. Блажени, алчущии ныне, яко насытитесь. Блажени, плачущии ныне, яко возсмеетесь. Блажени будете, егда возненавидят вас человецы, и егда разлучат вы и поносят, и пронесут имя ваше яко зло, Сына Человеческаго ради. Возрадуйтесь в той день и възиграйте, се бо мзда ваша многа на небеси.

Причастен: **В** память вечную: